

Februarie
2010

OVERSTRAND

	Telefoon	Faks
Hermanus	028 313 8000	028 312 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445

24 Uur Beheerkamer Brandweer	028 313 8000/8111 028 312 2400
---------------------------------	-----------------------------------

Bulletin

Amptelike nuusbrief van Munisipaliteit Overstrand

BESKERMINGSDIENSTE TOON STAAL AANRANDINGS, BRANDE, VAKANSIEVERKEER GOED GEHANTEER

Overstrand het in Desember vir meer as sy deel van die slegte nuus op koerante se voorblaaie gesorg, maar wat ook duidelik uit die beriggewing geblyk het, was die paraatheid van sy Direkoraat Beskermingsdienste en daadwerklike optrede van besluitnemers om probleme die hoof te bied.

Die aanvalle op toeriste in die Fernkloof-natuurreservaat het internasionaal opslae gemaak en 'n nadelige uitwerking op besoekersgetalle gehad. Veiligheidsmaatreëls is onder die leiding van die Munisipale Bestuurder, mnr Werner Zybrands, en die Direkteur van Beskermingsdienste, mnr Neville Michaels, ingestel en het onder meer ingesluit die bepaling en patrolling van veilige roetes, begeleiding deur munisipale wetstoepassers, die voorsiening van fluitjies en pepersproei aan stappers en beheer by die hoofingang en die beginpunt van die vernaamste staproetes.

Uitstekende samewerking tussen die munisipale wetstoepassers, die SA Polisie diens en private sekuriteitsorganisasies het uiteindelik gelei tot die inhegtenisname van die vermeende oortreders.

Volgens die reservaatbestuurder, mnr Grant Forbes, is die waaksaamheid nog nie verslap nie, maar hy is van mening dat natuurliefhebbers nie huiwerig hoef te wees om die reservaat te besoek nie.

Terwyl die Fernkloof-krisis nog aan die gang was, moes daar ook verskeie groot

brande in Overstrand en omliggende areas beveg word. Op 24 Desember het 'n groot brand naby Pearly Beach uitgebreek wat eers vyf dae later naby Kaap Agulhas onder bedwang gebring is. Dié vuur het meer as 50 000 hektaar fynbos verwoes, onder meer in die Kaap Agulhas Nasionale Park, waar huise en skure in die slag gebly en die lewe van 'n plaaswerker in die Agulhas-gebied geëis het.

'n Brand het op dieselfde dag op Franskraal uitgebreek wat huise bedreig het en ook vinnige optrede deur die Brandweerdienste van Overstrand geveer het.

Op 28 Desember het 'n brand by Hawston uitgebreek wat eers twee dae later onder bedwang gebring kon word, en op 6 Januarie het die berg by Kleinmond deurgeloopt nadat 'n brand in die plakkerskamp uitgebreek het.

Weer eens was daar in al die gevalle uitstekende samewerking tussen Overstrand se Brandweer en die Brandweerdienste van die Overbergse Distriksmunisipaliteit, CapeNature, Working on Fire-spanne en die Suid-Afrikaanse Lugmag.

Die oorsaak van al hierdie brande was vermoedelik te wyte aan nalatigheid, veral deur kinders.

Groot verkeersdrukte is op Overstrand se paaië ondervind. Volgens baie waarnemers was daar vanjaar meer besoekers aan die gebied, maar hul verblyfperiodes was korter. Spoedmetings is op 'n gereelde grondslag gedoen en baie parkeeroor-



Reservis-rekrute van Overstrand se Beskermingsdienste is in November deeglik opgelei en was gereed om met die 48 veldbrande, vier formele huisbrande, 16 informele huisbrande en vier reddingsoperasies in die vakansietyd hulp te verleen.

tredings het voorgekom. Verskeie motorvoertuigongelukke het ook voorgekom.

Volgens Verkeershoof Rudi Fraser was sy afdeling goed voorbereid hierop deurdat hulle 'n goeie operasionele plan gehad het en gereed was vir die hoë invloed van voertuie. Altesame 100 reserviste is voor die vakansie aangestel om die verskillende afdelings van die Direkoraat Beskermingsdienste met sy take te ondersteun.

Fraser was aangenaam verras met talle oproepe van die publiek om sy afdeling te bedank vir die ondankebare werk wat hulle

moes doen.

Burgemeester Theo Beylveldt het op 'n spesiale raadsvergadering op 14 Januarie 2009 sy dank betuig teenoor die Munisipale Bestuurder, die Direkteure, die Areabestuurders en almal wat by Beskermingsdienste en munisipale dienslewering betrokke is vir die werk wat hulle in die vakansietyd gedoen het. Talle komplimente is oor die strande, veral die drie Blouvlagstrande, ontvang en dit was duidelik dat die verbod op drankgebruik op strande daartoe bygedra het dat gesinne rustig kon ontsaan.

TUSSENVERKIESING WYK 1

Op die eerste spesiale raadsvergadering van die jaar op Donderdag 14 Januarie 2010 het die Speaker, mnr Anton Coetsee, bekend gemaak dat twee raadslede gedurende die raadsreses hul poste moes ontruim en dat daar in wyk 1 (Gansbaai, Masakhane en Blompark) waarskynlik op 24 Februarie 2010 'n munisipale tussenverkiesing sal moet plaasvind.

Die tussenverkiesing spruit voort uit dissiplinêre optrede in Augustus 2009 teen raadslid Voilet Tutu (NPP) weens die nie-bywoning van 10 vergaderings van die Portefeuljekomitee en Raad

tussen September 2007 en Junie 2009. Hoewel versagende omstandighede aangevoer is, het die Wes-Kaapse LUR vir Plaaslike Regering beslis dat dit nie in die gemeenskap se belang is dat sy in haar amp aanbly nie en haar as raadslid onthef.

Nog 'n lid van die National People's Party (NPP), rdl Moira Opperman, is deur haar party geskors en as raadslid onttrek. Sy het 'n proporsionele setel beklee en haar plaasvervanger sal binnekort deur die Onafhanklike Verkieungskommissie aangekondig word.

GELD VIR STRANDMEERBESTUUR

Die onlangse onverklaarbare vrektes onder vis in die Kleinrivier-strandmeer het die uiterste behoefte aan behoorlike bestuur van hierdie waardevolle natuurlike bate van die Overstrand uitgewys.

Tydens 2009 se laaste raadsvergadering is goedkeuring verleen vir die uitbreiding van die bedryfsbegroting vir omgewingsbestuur met R120 000 met die oog op die daarstelling van 'n strandmeerbestuurspos in Hermanus. Befondsing hiervoor is deur die Tafelbergfonds (TBF) voorsien.

Hierdie behoefte het onder die TBF se aandag gekom na 'n praatjie oor Overstrand se strandmere wat in Mei verlede

jaar deur Hermanus se omgewingsbeampte, me Willemien Swanepoel, by 'n konferensie van CAPE (Cape Action for People and the Environment) aangebied is.

TBF befonds die pos vir drie jaar teen 'n bedrag van R240 000 per jaar. Die munisipaliteit stel kantoorryimte en toerusting vir die driejaartydperk beskikbaar.

Munisipaliteit Overstrand, in samewerking met CAPE, het omgewingsbestuursplanne vir die twee geprioritiseerde strandmere binne die munisipale grense, naamlik Kleinrivier en Botriver, ontwikkel. Die strandmeerbestuurder sal op die daarstelling van organisatoriese reëlings en institusionele kapasiteit fokus.

STALLETJES ONDESKRAAG HISTORIESE DORPSKERN

Die herontwikkeling van Markplein in Hermanus het in sy finale fase 'n mate van polemieks rondom die gekose boumateriaal en die grootte van die handelskompleks ontlok.

Hierdie ontwikkeling is amptelik op 15 Desember 2009 geopen met die oorhandiging van die sleutels tot die nuwe Toeriste-inligtingkiosk op die plein aan mnr Dan Acker, Visevoorsitter van Cape Whale Coast, Overstrand se bestemmingbemarkingsorganisasie.

Die handelaars het dadelik flink begin handeldryf vanuit hul splinternuwe fasiliteite, en dit het gou uit koerantverslae, telefoonoprope en briewe geblyk dat beide besoekers en inwoners die sinkplaatgeboue in hul historiese rooi aanvaar asof hulle nog maar altyd deel van Hermanus was.

"Ons is verlig oor die manier waarop dinge verloop het", sê Uitvoerende Burgemeester Theo Beyleveldt. "Die nuwe handelskompleks op Markplein in Hermanus bied nie net 'n praktiese oplossing vir die behoefte aan ruimte om geleenthede vir informele ekonomiese ontwikkeling te skep nie maar is, inderwaarheid, gratis deur een van die dorp se toonaangewende argitekte ontwerp as 'n bydrae om die oorspronklike Victoriaanse vissersdorpkarakter van die SSB te onderskraag."

Argitek Andrew Greeff, 'n lid van die Erfenis Komitee, sê die oorspronklike ontwerp vir die handelstrukture was nie vir die komitee aanvaarbaar nie. Dit sou uit 'n geboue struktuur met gewels en 'n houtskoolkleurige, geteelde dak bestaan wat onvanpas in Markplein sou wees.

Sy ontwerp het die gevoel van permanentie grootliks versag deur van sinkplaat

met 'n Victoriaanse profiel gebruik te maak. Hierdie ontwerp praat nie net dieselfde taal as die dakke van die Ou Hawe-museum se geboue nie maar is ook van materiaal wat algemeen deur inwoners van die vroeë Hermanus gebruik is. Die kleur wat gebruik is, staan bekend as "Erfenisrooi" en is die naaste aan die lood waarmee sinkplaat in vervloë dae geverf is.

Die strukture is kleiner as dié wat aanvanklik beplan is en deur vir korridors tussen die strukture voorsiening te maak, kan verbygangers steeds blikke op die see, die berg en die dorp van alle kante geniet. Elkeen van die eenhede huisves vier handelaars, wie in staat sal wees om hul ware teen sluitingstyd weg te sluit. Stoorruimte is ook geskep deur die dakke te lig, wat tegelyk verseker dat stalletjies ooreenkomstig die vereistes vir beroepsgeondheid voldoende geventileer word.

Alhoewel die hoofkorridors altyd oop bly, kan die oorblywende gedeeltes met behulp van afroldeure gesluit word om snags as bykomende stoorruimte vir voutafels ensovoorts te dien.

Daar moet ook kennis geneem word dat alhoewel parkeerruimte verminder is, verkopers nie toegelaat word om die beskikbare ruimte vir langtermynparkeering gedurende die dag te gebruik nie.

Met Lighthouse Construction van Hermanus as subkontraakteur het die koste vir die oprigting van die strukture meer as R2,9 miljoen beloop. Daar is vooraf wyd met belangstellende en geaffekteerde partye oor die planne beraadslaag, welke partye die wykskomitees, die Bestemmingbemarkingsorganisasie, die aangrensende grondeienaars, die handelaars en die sakevereniging ingesluit het.



Waar smous en koper voorheen vir seile en wankelrige strukture moes kies, kan daar nou sorgeloos en met hartelus gekibbel word oor 'n goeie prys vir daardie seldsame artikel.

KEURKONSERT VIR VALENTYNSNAG

Inwoners van Hermanus wat 'n romantiese aandjie op Valentynsdag (Sondag, 14 Februarie 2010) wil geniet, moet beslis die uitvoering deur Capella Concertante in die Burgersentrum se auditorium oorweeg. Overstrand Arts/Kunste het daarin geslaag om hierdie Oostenrykse groep, wat hul 25ste bestaansjaar by wyse van 'n toer deur Namibië en Suid-Afrika vier, te lok. Die groep gaan gewaardeerde klassieke werke deur Mozart, Johann Strauss, Franz Lehar en andere uitvoer. Besprekings kan gedoen word by Bellini Gallery, 028 312 4988.



'N PARADYS VIR BUITELUGSPORT

Die Totalsports-uitdaging wat op Saterdag 9 Januarie in Kleinmond gehou is, het 'n bedrywige en gebeurtenisvolle somervakansie in Overstrand gepas afgesluit. In die algemeen is buitemuurse sportgeleenthede soos padwedlope asook strandrugby- en -kriekettoernooie goed ondersteun. Die slegte weer het dan en wan 'n impak gehad, met twee van die Totalsports-uitdaging se sewe aflositems wat weens ongunstige toestande gekanselleer moes word. Desnieteenstaande is uitstekende prestasies aangeteken met die sewemanspan van Totalsports PRO wat die geleentheid in 'n gekombineerde tyd van 04ure14minute30skondes voltooi het. Hier wens die Burgemeester Theo Beyleveldt (links) Warren Petersen geluk met sy span se oorwinning in dié kategorie. Foto: www.oakpics.com



Hoe om te registreer vir die Munisipaliteit se SMS-diens

SMS u rekeningnommer met die letters SMS aan 082 338 1631 of kontak 'n Kliëntediensbeampte by u naaste Betaalsaal.

DO YOU PREFER THIS NEWSLETTER IN ANOTHER OFFICIAL LANGUAGE?
SMS your account number with E for English to 082 338 1631

UNGATHANDA LENCWADI YESAZISO-NDABA IBHALWE NGOLUNYE ULWIMI?
Thumela i-SMS enenombolo ye-akhawunti yakho kunye no X omele isi Xhosa kule nombolo 082 338 1631